


Հակառակ տարածվող լուրերի ու կանխատեսումների՝ Հայաստանի Գիտությունների ազգային ակադեմիայի նախագահի՝ երեկ նշանակված ընտրությունները չհետաձգվեցին ու չտապալվեցին: Ընտրության արդյունքում ԳԱԱ նախագահ ընտրվեց ԵՊՀ նախկին ռեկտոր, ակադեմիկոս Ռադիկ Մարտիրոսյանը:

Ռադիկ Մարտիրոսյանը՝ Ակադեմիայի նախագահ



Լուս.՝ ԳԵՐՄԱՆ ԱՄՆՆԵՐԻՆ

Հարկ է նշել, որ ԳԱԱ նախագահի պաշտոնի համար առաջադրվել էին երեք թեկնածուներ. ԳԱԱ Մեխանիկայի ինստիտուտի տնօրեն Լենսեր Աղալովյանը, ԳԱԱ գիտական քարտուղար Էդուարդ Ղազարյանը և ԵՊՀ նախկին ռեկտոր Ռադիկ Մարտիրոսյանը: Վերջինիս թեկնածությունն առաջադրել էր ԵՊՀ պրոռեկտոր, ակադեմիկոս Էդուարդ Չուբարյանը: Է. Ղազարյանի թեկնածությունն առաջադրել էր ակադեմիկոս Վանիկ Զաքարյանը, իսկ Լ. Ղազարյանինը՝ ակադեմիկոս Սերգեյ Սարինյանը: ԳԱԱ 80 ակադեմիկոսներից և 18 թղթակից անդամներից քվեարկությանը մասնակցեցին 79 ակադեմիկոսներ և թղթակից անդամներ: Նիստին մասնակցում էր նաև կրթության և գիտության փոխնախարար Արտակ Սահրադյանը: Լ. Աղալովյանի՝ ԳԱԱ

նախագահ դառնալու օգտին քվեարկել էին 35, դեմ էին նույնպես 35 անձինք, գիտական քարտուղար Է. Ղազարյանի թեկնածությանը հավանություն էին տվել 36 անձ, դեմ էր արտահայտվել 37-ը: Իսկ ահա ԵՊՀ նախկին ռեկտոր Ռ. Մարտիրոսյանի թեկնածությանը կողմ էին արտահայտվել 46, դեմ՝ 27 մարդ, որի շնորհիվ էլ Ռ. Մարտիրոսյանը դարձավ ԳԱԱ նախագահ: Նշենք, որ համաձայն ԳԱԱ կանոնադրության, քվեարկության մասնակիցը կարող է նույն կերպ քվեարկել բոլոր թեկնածուների դեպքում: Եվ քվեարկության վերը նշված պատ-

կերն էլ վկայում է այն մասին, որ ակադեմիկոսներից շատերը միանգամից կողմ կան դեմ են քվեարկել մեկից ավելի թեկնածուների: «Մենք պետք է վերականգնենք մեր գիտության բարձր վարկն աշխարհում», - քվեարկության արդյունքների ամփոփումից հետո հայտարարեց ԳԱԱ նորընտիր նախագահը՝ հավելելով, որ այսօր էլ կան բարձր մակարդակով արվող հետազոտություններ, սակայն աստիճանաբար նրանց բազան փոքրանում է: «Ես իմ ձեռքը մեկնում եմ բոլորին՝ նախևառաջ ակադեմիայի անդամներին, ինստիտուտների

տնօրեններին... Ով շահագրգռված է, որ մեր գիտությունը զարգանա, մենք հաջողություններ ունենանք, նա իմ դաշնակիցն է: Իսկ ովքեր զբաղված էին բարդ մթնոլորտ ստեղծելով, երևի թե նրանց հետ ես չեմ կարող դաշնակից լինել», - նշեց Ռադիկ Մարտիրոսյանը: Վերջինս, անդրադառնալով իր առաջիկա քայլերին՝ նշեց, որ նախ պետք է բոլոր հիմնարկներում շատ լավ ուսումնասիրեն գիտական հետազոտությունները. ինչպիսի՞ն են նրանք, ի՞նչ մակարդակ ունեն, ի՞նչ տեղ ունեն այսօրվա համաշխարհային գիտության ասպարեզում: Եվ երբ այս ամենի արդյունքում էլ կորոշվեն հիմնական այն ուղղությունները, որոնք պետք է աջակցություն ստանան: Ռ. Մարտիրոսյանի խոսքերով՝ այդ ծրագրերի իրականացման համար պետական հովանավորությունը քիչ է, և պետք է այլընտրանքային միջոցներ գտնել: Հետաքրքիր է, իսկ ի՞նչ կարծիքի է ԳԱԱ նորընտիր նախագահը՝ ԳԱԱ-ն բարեփոխելու՝ ՄԱԿ-ի առաջարկած ծրագրի մասին: «Եհիշտն ասած, ես մինչև այսօր չեմ ծանոթացել ՄԱԿ-ի այդ ծրագրին, - նշեց Ռ. Մարտիրոսյանը՝ միաժամանակ հավելելով,- ծրագրեր շատ կան ամբողջ աշխարհում՝ Ռուսաստանում և ԱՊՀ այլ երկրներում, բայց մենք պետք է մեր ծրագիրն ունենանք՝ հաշվի առնելով առողջ,

առաջադիմական բոլոր այն գաղափարները, որոնք նպաստում են գիտության զարգացմանը»: Ռ. Մարտիրոսյանը խոստանում է, որ ԳԱԱ նախագահության ամբողջ գործունեությունը կլինի բացարձակ թափանցիկ: Նա անդրադարձավ նաև «Պետական ոչ առևտրային կազմակերպությունների մասին» ՀՀ օրենքին, նշելով, որ իր կարծիքով՝ դա գիտական կազմակերպությունների կարգավիճակի մասին լավագույն տարբերակը չէ: Հիշեցնենք, որ համաձայն այդ օրենքի, 65 տարին լրացած ոչ մի անձ իրավունք չունի պետական ոչ առևտրային կազմակերպությունում գործադիր ղեկավարի պաշտոն զբաղեցնել, իսկ ԳԱԱ-ն հենց այդպիսի կազմակերպություն է: Անդրադառնալով այս խնդրին՝ Ռ. Մարտիրոսյանը նշեց, որ ընդամենը 1-2 շաբաթ առաջ Իտալիայի պես երկրի նախագահ ընտրեցին 81-ամյա մի մարդու: «Ղա ընտրողների խնդիրն է: Ընտրովի պաշտոնների տարիքային սահմանափակումը հակասահմանադրական է», - հայտարարեց նա: Վերջինս, անդրադառնալով ակադեմիկոս Հանրի Ներսիսյանին, նշեց, որ նրան շատ նորմալ է վերաբերվում: «Հանրի Ներսիսյանը լավ գիտնական է: Նա հայտնի մաթեմատիկոս է», - նշեց Ռ. Մարտիրոսյանը:

ՌԱՖԱՅԵԼ ԹԵՅՄՈՒՐԱԶՅԱՆ